

**■ CONVIVENZA**

# Davart da sis en il lotto, culps da chametg e trens sviads

DA PIEDER CAMINADA\*

**A**vais Vus già ḡi ina giada in da sis en il lotto? Cun gronda probabilitad betg. Pertge che statistica-main è la schanza individua-la da far in da sis en il lotto pli che minima cun ina probabilitad da 0,0000064 pertschient. Ubain in zic pli chapibel: per gudagnar il jackpot mo cun ina probabilitad da 95 pertschient sturessas Vus far lotto duas giadas l'emna durant 450 000 onns – e dar ora per quai al minimum 234 milliuns francs. Per quest motiv è era la probabilitad plitost pitschna che Vus enconuscha personalmain insatgi che ha già ina giada in da sis en il lotto.

**M**edememain fitg pi-tschna è la probabilitad che Vus essas già ina giada vegnids tutgads d'in chametg. Statisticamain è la «schanza» bain 176 giadas pli gronda che da gu-dagnar il jackpot en il lotto. Tuttina è la probabilitad che Vus enconuscha personalmain insatgi ch'è da-ventà l'unfrenda d'in culp da chametg anc adina fitg, fitg minima.

**E**d jau? Enfin oz n'hai jau già ni in da sis en il lotto ni sun jau vegnì tutgà d'in chametg. Ma jau enconuscha almain personalmain insatgi che ha tippà en il lotto tuts dumbers endretg, ed jau enconusch ultra da quai era personalmain insatgi che è già ina giada vegnì tutgà d'in chametg (ed ha survivì per fortuna).

**M**algrà tuttas calculaziuns d'improbabilitad sun jau tuttina già stà fitg damanaivel tant dad in da sis en il lotto sco era dad in



culp da chametg. En il lotto hai jau già avant passa 40 onns in da tschintg (che ha deplorablamain pajà mal-amain) – e sche jau avess tar in dumber be fatg la crusch en il quadret gist daspera, fissi perfin stà in da sis. Tar il culp da chametg sun jau stà duas giadas perfin pli datiers che en il lotto. Ina giada, cura che mes collega (vesair sura) è vegnì tutgà d'in chametg sin la piazza da ballape a Mustér ed jau era stà gist sper el be in pèr secundas avant. Ed in'autra giada sin ina piazza da campar en il Tessin, cura ch'in chametg è dà en en in indriz electric be dus, traiss meters sper mai.

**P**ersuenter sun jau stà en il center da dus auters eveniments che succedan era mo fitg darar. Uschia sun jau sesì en in tren da la Viasier retica che era i sur ils binaris ora pervia d'ina bova tranter Versomi e Vallenau – e nua che tut ils passagiers èn dal reminent mitschads cun la tema. E dapi l'enviern passà fatsch jau part dals Grischuns betg uschè numerus che han già scuntrà ina giada in luf.

**P**ertge che jau raquint tut quai? Adina cura ch'i capita insatge extraordinarí cun nus, numnain nus quai gugent ina casuallat. Ma datti insumma

casualitads? N'è quai betg già tut predeterminà? L'emprova da responder a questa dumonda existenziala surlasch jau pli gugent als filosofs. Per mai è «casualitat» simplamain in eveniment che jau na poss betg declarar causalmain, perquai ch'i n'è stà ni calcu-label ni previsibel.

**D**aspera stuess jau però savair che tut è be ina dumonda da la probabilitad. U ditg in zic pli pregnat: sche jau fatsch in da sis en il lotto u sche jau vegn tutgà d'in chametg, n'è quai betg ina casualitat, mabain be l'adempilment d'ina (era mo pitschna) probabilitad. Dal reminent: encunter l'emprim adempilment n'avess jau naturalmain nagut – ed al segund renunziesch jau da libra voluntad suenter mias experientschas personalas cun culps da chametg.

\* **Pieder Caminada** è mainaproject scolaziun e redactur tar la «Südostschweiz». El è creschì si a Glion en in ambient per gronda part tudestg e viva oz en il vitg rumantsch da Castrisch.

## Vocabulari

culp da chametg	Blitzschlag
tren svìa	entgleister Zug
probabilitad	Wahrscheinlichkeit
unfrenda	Opfer
tutgar	treffen, einschlagen
dumber	Zahl
pajar	zahlen, bezahlen
quadret	Kästchen, kleines Feld
vesair sura	siehe oben
indriz electric	hier: Elektrokasten
eveniment	Ergebnis
ir sur ils binaris (ora)	entgleisen
bova	Felssturz
mitschar	cun la tema – mit dem Schrecken davonkommen
scuntrar	begegnen
luf	Wolf
predeterminà	vorausbestimmt
previsibel	voraussehbar
adempilment	Eintreten, Erfüllung

Unterstützt von der  
**Lia Rumantscha**



Lia Rumantscha